

Zajednički preliminarni zaključci sa konferencije stručnjaka OHR-a i haškog Tribunala o obimu aktivnosti procesuiranja ratnih zločina u Bosni i Hercegovini

Predsjednik Međunarodnog tribunala za zločine počinjene na teritoriji bivše Jugoslavije, sudija Claude Jorda i viši zamjenik Visokog predstavnika i šef Ogranka za vladavinu prava, Bernard Fassier, su danas zaključili stručnu konferenciju o obimu aktivnosti koje se odnose na procesuiranje ratnih zločina u Bosni i Hercegovini, u čijem radu su sudjelovali eksperti iz ove oblasti. Sudionici konferencije su razgovarali o aktivnostima koje je potrebno preuzeti kako bi se omogućilo efikasno procesuiranje ratnih zločina u Bosni i Hercegovini.

Uvjereni da se radi o važnom i hitnom pitanju, stručnjaci haškog Tribunala i OHR-a su na konstruktivan način i u duhu saradnje razmotrili njegove parametre i obim. Sudionici konferencije su nastojali da za predstavnike međunarodne zajednice osiguraju bolje razumijevanje tehničkih zahtjeva vezanih za ovaj projekat, uključujući i broj predmeta koje će biti potrebno razmotriti kao i finansijska opterećenja koja proizilaze iz razvijanja ovakvih kapaciteta u Bosni i Hercegovini.

Sudionici konferencije su donijeli sljedeće preliminarne zaključke:

- Najpogodnija institucija za procesuiranje ratnih zločina

u BiH bi bilo specijalizirano Vijeće u okviru Državnog suda BiH.

- Ovo Vijeće bi imalo jurisdikciju nad slučajevima koje bi mu uputio ICTY kao i nad najosjetljivijim slučajevima ratnih zločina na čije se procesuiranje čeka pred državnim institucijama.
- Kao dio Suda BiH, ovo Vijeće bi bilo državna institucija u kojoj bi privremeno radili i strani državljanici.
- Utvrđene su i razmotrene opcije vezane za financiranje i pronalaženje objekata koji bi bili potrebni za ovakav projekat. Predstavnici međunarodne zajednice i njeni partneri u BiH će morati definirati i dalje razgovarati o potrebnim zahtjevima.
- Sveobuhvatni program zaštite svjedoka i sudija biti će suštinski dio ovog projekta.
- O formiranju ovog specijaliziranog Vijeća razgovarati će se i u okviru konsultacija između predstavnika OHR-a i lokalnih organa vlasti koje se trenutno odvijaju o pitanjima Državnog suda BiH i Tužilaštva BiH.

Kopredsjedavajući konferencije su iskoristili posjetu Javiera Solane, generalnog sekretara Vijeća Evropske Unije i visokog predstavnika za zajedničku vanjsku i sigurnosnu politiku i ministra vanjskih poslova Grčke, George Papandreua povodom inauguracije Policijske misije EU kako bi ih obavijestili o napretku koji je postignut tokom konferencije. O tome su obavijestili i ambasadore zemalja članica Evropske Unije. Ovi preliminarni zaključci će biti prezentirani i na sjednici Upravnog odbora Vijeća za implementaciju mira krajem januara 2003. godine.

Naredni sastanak stručnjaka, na kojem će biti finalizirati prijedlozi, planiran je u trećoj sedmici februara 2003. godine u Hagu. Nakon toga prijedlozi će što je prije moguće biti prezentirani Vijeću sigurnosti UN-a.